

CHATS

E

FATGS

CHATS E FATGS

La noziun «archeologia» deriva dals pleds grecs «archaios» (vegl) e «logos» (instrucziun). Ella vul dir uschè bler sco «enconuschientscha dal temp antic» u «scienza dal temp antic», sa referind adina a l'istorgia da l'uman e da ses conturns.

Oriundamain sa fatschentava l'archeologia cun las epocas senza scrittiras u cun epocas ch'èn povras da documents scrits, quai vul dir da la preistorgia e da l'istorgia tempriva (epoca romana). Quai uschenavant ch'ellas han pudiè vegnir rendidas accessiblas tras exchavaziuns, pia cun render visibel ils contexts da chats archeologics. Quai pon esser culegnas entiras, dentant er restanzas da chasas, champs da fossas e foss. Autras restanzas da l'actividad humana èn per exemplu plazzas da cult, chats da deposits e deposits da luadiras, er chats sco utensils e guaffens da crap, objects da metal, cheramica, artefacts dad ossa u rument d'ossa.

L'incumbensa e la finamira da l'archeologia è quella da chavar ora, da documentar e d'interpretar uschè bain sco pussaivel ils fatgs dals chats sco er ils chats sezs. Els possibiliteschan conclusiuns tar l'istorgia da l'uman e da ses conturns naturals, pia da far constataziuns istoricas.

Pli tard è la metoda archeologica vegnida applitgada er per epochas istoricas. Latiers tutga l'archeologia dal temp medieval, la perscrutaziun da chastels, l'archeologia da baselgia, la perscrutaziun da centers da citads e schizunt l'archeologia industriala. L'ultima s'occupa er da temas moderns, sco per exemplu minieras, galarias da la miniera, furns da luentar, chal-teras, producziun da cheramica e da vaider sco er da divers aspects dal commerzi. Quest rom scientific tanscha per part fin en il 20avel tschientaner.

L'archeologia è ozendi ina scienza moderna che collavura stretgamain cun disciplinas da las scienzas naturalas. Latiers tutgan la botanica, la zoologia, l'antropologia, la climatologia, la geologia, la dendrocronologia, la chemia e la fisica (dataziuns cun la metoda da C-14).

L'archeologia en il Grischun Gia il 16. tschientaner devi umans en il Grischun che s'interessavan per l'archeologia. Ulrich Campell per exemplu ha menziunà enturn l'onn 1570 las pitgas ed ils vials per chars sin il pass dal Güglia. In'activitat archeologica da rimnada po vegnir cumprovada

per il cumenzament dal 19. tschientaner per il Welschdörfli roman da Cuira. L'onn 1869 è vegnida fundada la societad istorica antiquara e l'onn 1872 il museum retic. L'onn 1903 è cumparida la «Urgeschichte Graubündens mit Einschluss der Römerzeit».

In'emprima exchavaziun archeologica è vegnida fatga l'onn 1902 en la «Custorei» da Cuira (oz: piazza da la Stadthalle). Ulteriuras activitads archeologicas hai dà ils onns 1930 fin 1950 sut la direcziun dal selvicultur Walo Burkart. A questa era appartegnan er ils numbs da Hans Conrad, Walter Sulser e Benedikt Frei.

Suenter ch'ina piazza da conservatur è vegnida stgaffida l'onn 1960 al museum retic, han er pudì vegnir fatgas exchavaziuns d'urgenza. Cun la fundaziun dal servetsch archeologic l'onn 1967 è s'augmentada fermamain l'activitat archeologica cun exchavaziuns voluminudas e cun numerusas publicaziuns.

TEMP DA CRAP

600 000–2200 avant Cristus

Il temp da crap è la perioda la pli lunga da l'istorgia da l'umanitad. Ses cumentzaments sa chattan – en quai che reguarda il territori da la Svizra – per gronda part anc en il stgir.

Temp da crap tempriv (paleoliticum) Durant il temp da crap tempriv eran las valladas da las Alps cuvridas d'enormas massas da glatsch. Pervia da quai n'èsi strusch da spetgar ch'ii dettia lieus da chat paleolitics u chats da quel temp. Mo a l'ur u sur ils glatschers èsi imaginabel da chattar objects ch'ils chatschaders d'urs da cuvels han pers en cuvels u sut spelms che servivan sco tetgs. Quai è per exemplel il cas en il «Drachenloch» sur Vättis (SG) sin 2450 m u en il cuvel d'Apollo sur St. Antönien-Partnun sin 2300 m. Là han ins chattà utensils fitg simpels da crap e dad ossa, per part er fuclars.

Tranter il 14. ed il 12. millenni èn ils glatschers da la Val dal Rain luads. Alura è sa furmada in'emprima vegetaziun en la Val dal Rain grischuna. La selvaschina è immigrada nà dal nord en la Val dal Rain alpin. Seguind ils fastizs da la selvaschina èn arrivadas gruppas da chatschaders ils mais da stad. L'enviern vivevan quellas bain en la regiun dal Vorarlberg (radiolarit dal Grosses Walsertal e silex da la Baviera).

Da la fasa la pli tardiva dal paleoliticum derivan utensils da radiolarit, da silex e da cristal da muntogna

da Cuira-Marsöl. Els dateschan dal temp tranter 11000 e 9500 avant Cristus.

Temp da crap mesaun (mesoliticum) Er dal temp da crap mesaun èn enconuschents mo paucs lieus da chat en il Grischun. Igl è significativ che la plazza da pussar dals chatschaders mesolitics-neolitics da Mesauc-Tec Nev sa chattava fin ad 8m sut il tschispet actual. Mo grazia a la construcziun da l'autostrada è ella vegnida scuvrida. Tar quest lieu da chat èn vegnids chattads blers artefacts elavurads da silex e vers 4000 stgaglias da silex e da cristal. Els derivan dal mesoliticum tempriv e tardiv. Ins ha er chattà in pèr tocs da cheramica e da silex dal neoliticum tempriv.

Culegnas e plazzas da pusar mesoliticas sa chattan oz bain en il territori dal funs da la val sut bler material da bovas e da sbuvadas. U l'activitat dals flums ha destrui ellas definitivamain en il decurs dals millennis.

Perunter chattan ins adina pli savens plazzas da pussar da chatschaders en zonas alpinas. Uschia per exempl sin il Pian dei Cavalli (Valle San Giacomo, Italia, 2200 m) che na sa chatta betg lunsch davent dal Mesauc. Auters exempels enconuschents èn il Plan Canin en la Val Forno (en il sid da Malögia, 1990 m) u en il territori dal Lai da Rims (Val Müstair, 2400 m).

Temp da crap tardiv (neolithicum) Oz enconuschain nus tut en tut nov culegnas neoliticas en il Grischun: Cuira-areal Zindel ed Ackermann, Vaz sut-Haselboden e Haselbodenkopf, Zizers-Friedau, Tumein-Crestis, Cazas-Petrushügel, Mesauc-Tec Nev e Castaneda-Pian del Remit. I sa tracta qua senza excepziun da culegnas pitschnas che n'èn strusch vegnididas abitadas pli ditg che 100 fin 150 onns. Entant che singulas da questas culegnas derivan anc d'in neoliticum tempriv fin sviluppà (5./4. millenni per Zizers, Cuira, Mesauc), appartegnan las ulteriuras culegnas plitgunsch ad ina fasa tardiva dal temp da crap tardiv (3. millenni).

Interessanta è la cumprova d'ina cultivaziun dad ers cun araders a Cuira ed a Castaneda. Remartgabel è er il fatg che questas culegnas sa concentreschan sin las vals da transit situadas a bass (Val dal Rain, Tumleastga e Mesauc). Ina plazza da pussar neolitica è enconuschenta a Zernez-Ova Spin. Numerus èn chats singuls neolitics en las muntognas u en valladas situadas ad aut sco per exempl maneras da crap, utensils da silex e da cristal. Tut quests chats derivan plitgunsch da chatschaders u da pasters e na fan strusch part da culegnas.

TEMP DA BRONZ

2200–800 avant Cristus

Entant che utensils d'arom eran gia cumparids en la fasa tardiva dal temp da crap tardiv, èn ussa da nov iseglia ed armas vegnididas construidas da bronz. (Bronz è ina lega d'arom e da zin).

Cun il temp da bronz tempriv ha cumenzà ina nova colonisaziun intensiva dal territori alpin grischun. Las paucas culegnas dal temp da crap tardiv èn vegnididas remplazzadas da tschuncanta fin sessanta culegnas che han existì pli ditg. Ellas n'èn betg mo vegnididas erigidas en las valladas bassas, mabain er en vals autalpinas (Lumnezia, Surses, Engiadina). Questas novas colonisaziuns dastgassan bain avair lur raschun en la scuverta da minerals d'arom sin territori grischun. La nova tecnica d'elavuruar arom ha laschè nascher novas activitads. Latiers tutgan la prospecziun d'arom, las minieras, l'explotaziun d'arom, il cular bronz e.u.v. Quai dastgass avair chaschunà in commerzi pli intensiv sur ils pass da las Alps e la finala tscherts midaments da las structuras socialas.

Ils abitants da las vischnancas dal temp da bronz eran purs. Els sa nutritvan da la cultivaziun dad ers (furment, furment d'in graun, furment dubel, spelta, ierdi e.u.v.) e da l'allevament da muvel. La chatscha giugava mo pli ina rolla fitg secundara.

En il temp da bronz tempriv e mesaun e per part anc en il temp da bronz tardiv è vegnida vivida – sin basa

da furmas da cheramica spezialas – ina cultura independenta sin territori grischun. Pli baud vegniva ella numnada la «cultura da Crestaulta», ozendi la «cultura interalpina dal temp da bronz». Ella sa differenziescha cleramain da las culturas sidalpinas e nordalpinas.

En il decurs dal temp da bronz tardiv (13.–9. tschientaner avant Cristus) è questa «cultura interalpina dal temp da bronz» evidentamain vegnida stgatschada. Novas culturas èn da quest temp avanzadas en il territori alpin grischun. Ellas han chaschunà ina tripartiziun culturala che sa lascha demussar fitg bain er anc en il temp da fier.

Culegnas Culegnas dal temp da bronz sa chattavan per regla sin muttas, sin strivlas da grip marcantas e sin terrassas da costas che pudevan vegnir defen-didas bain. Culegnas en il funs da la val paran da cumparair pir en il temp da bronz tardiv. A Savognin-Padnal è la culegna vegnida erigida en ina foppa natirala d'ina profunditat da 2 fin 3 m, a Cazas-Cresta schizunt en ina sfessa dal grip d'ina profunditat da 5 fin 6 m. A Falera-Muota sa chattava la culegna tranter gronds blocs da crap. Ella è stada fortifitgada cun in mir da tschinta. Quai lascha supponer ch'ils emprims abitants da questa culegna avevan in grond basegn da sa proteger.

En culegnas ch'èn exchavadas bain sa laschan cum-provar construcziuns cun pitgas verticalas u construcziuns da travs cun fuclars u schizunt entiras structuras d'abitadi. La cisterna da Savognin-Padnal e la tschiffada d'aua da funtauna da San Murezzan èn perditgas d'ina tecnica da construcziun en lain fitg sviluppada. Ils edifizis d'abitar èn per regla vegnids construids en lain da laresch. Lain da pign è vegni duvrà oravant tut sco material d'arder. Las culegnas han per part survivì plirs tschient onns u schizunt pli che milli onns. En culegnas pitschnas vivevan 20 fin 30 persunas, en culegnas pli grondas 50 fin 100 persunas.

Objects chattads en fossas Dal territori alpin grischun èn enconuschents mo paucs objects ch'èn vegnids chattads en fossas dal temp da bronz. A Donat-Surses èn vegnids chattads ils onns 1926 e 1961 sis sarcofags cun skelets. Ils objects agiuntads a la fossa dateschan d'in temp da bronz tardiv (17./16. tschientaner avant Cristus). En cas da la renumada «fossa da cupla da Donat» dastgassi però sa tractar d'in tschaler d'arvieut medieval (crot) che ha donnegià ina fossa dal temp da bronz tempriv.

Ulteriuras fossas cun skelets dal temp da bronz tempriv senza objects agiuntads a la fossa datti er a Laax-Salums. D'ina impurtanza fitg gronda èn indesch fossas

a cremaziun da Lumbrein-Surin-Cresta Petschna. Tut las fossas èn fossas da dunnas che appartegnan evidentamain a la culegna da Crestaulta. Ellas tuttas cuntexnan ritgs supplements da cliniez. Ellas dateschan dal temp da bronz tempriv (16./cumentzament dal 15. tschientaner) e cumprovan l'influenza da la cultura da tiembels.

Dal temp da bronz tardiv è enconuschenet in santeri cun urnas a Fläsch-Answiesen ch'è displaschavlamain destrui fermamain ed ina fossa d'ina dunna a Domat. Questa ultima cuntexneva ina fivla d'artg da derivanza meridiunala, ureglins ed in pau cheramica.

Chats en las muntognas ed en las auas Numerus èn ils chats singuls ch'èn vegnids fatgs en las muntognas u sin ils ospizis dals pass. I pudess sa tractar da chaussas che chatschaders u pasters han pers. Quests chats èn forsa er ina perditga d'ina economia d'alp dal temp da bronz. En singuls cas pudessi er sa tractar d'unfrendas ad ina divinitad da muntogna.

Gist uschè savens èn vegnids chattads per exempl spadas, lantschas ed autres chaussas en auas, en flums, en lais u er en regiuns da funtaunas. Sch'i sa tracta en quest connex d'objects pers u d'unfrendas ad ina divinitad d'aua n'è betg cler. Duas maneras u sigirs da bronz tar ina funtauna sur Rueun u plirs chats da spadas, in stilet ed ina gluva en la tschiffada

d'aua da funtauna da San Murezzan Bogn èn forsa stads unfrendas ad ina divinitad da funtauna.

La tschiffada d'aua da funtauna da San Murezzan è in indriz ch'è fitg interessant or dal puntg da vista da la construcziun en lain. Ella consista d'ina chascha ch'è construïda cun laina radunda e d'ina chascha ch'è construïda cun aissas, plinavant da dus bischens verticals a l'intern sco er d'ina pitga da raiver. Tut è fatg en lain da laresch e datescha da la mesadad dal 15. tschientaner avant Cristus.

Cliniez En il temp da bronz èn fitg savens vegnidas duvradas gluvas da bronz per tegnair ensemble la vestgadira. Uschia han ins serrà la taila da glin grossa. Dapi il temp da bronz tardiv han fivlas remplazzà las gluvas da bronz. Sco ulteriurs objects da decoraziun enconuschevan ins bratschlets ed anels, culaunas cun ambras e cun rollinas da bronz u cun rudellas cun pizs. Buttuns d'oss e da bronz èn bain vegnids cusids sin la taila. L'intent d'utilisaziun da las rosas da corna da tschierv è intschert. La lamella cun dents da ver vegniva forsa duvrada da l'artger sco platta per proteger il maun.

L'object da chat il pli impurtant è la gluva cun palutta da Falera-Muota. Ella è ornada ritgamain ed ha ina lunghezza dad 85 cm. Pervia da sia lunghezza èsi pauc probabel ch'ina dunna l'haja pertada. Ella pudess

esser vegnida duvrada sco object da cult u da prestige, per exemplu per decorar ina statua da lain.

Cliniez da bronz e d'ambra è stà in privilegi da la classa sociala superiura. Metter il cliniez en la fossa dueva segirar la posizion sociala da la persuna defuncta en l'auter mund. I deva segiraramain er cliniez da materials pli simpels che n'è però betg sa mantegni.

TEMP DA FIER

800–15 avant Cristus

Il temp da fier vegn dividì en ina fasa pli veglia (temp da Hallstatt) ed en ina fasa pli giuvna (temp da Latène). En il temp da fier ha il fier cumentzà a s'establir sco materia prima. Utensils ed armas da bronz èn adina pli savens vegnids remplazzads tras artefacts da fier. Il fier ha gronds avantatgs: el è resistent ed elastic ed è da chattar bler pli savens che arom en il territori alpin. Bronz è però vegni duvrà vinavant per cliniez. L'elavuraziun da fier pretendeva grondas enconuschentschas tecnicas. Spezialists sco miniers, culaders da fier e ferrers èn stads necessaris. Furns da luentar e fuschinas han stuì vegnir construïds.

Il commerzi sur ils pass da las Alps ha giugà vinavant ina gronda rolla. Per l'emprima giada è la scrittura cumparida, en il temp da fier tardiv er l'economia monetara.

Il maletg da las culegnas dal temp da fier correspunda per gronda part a quel dal temp da bronz. Dapi il temp da bronz tardiv hai dà en il Grischun – bain pervia dal squitsch da l'exteriur – ina tripartiziun culturala. Quella è percorschibla cleramain durant tut il temp da fier.

Ils Rets En il temp da bronz tardiv ed en il temp da fier pli tardiv sa chattan en il sidost dal Grischun (Engiadina bassa, Val Müstair) perditgas da la cultura da Laugen-Melaun. Ses caracteristicum che definescha la cultura è la cria cun manetschs da Laugen-Melaun. Ella sa chatta en il Trentino, en il Tirol dal sid ed en l'Engiadina bassa e mo sporadicamain en la Val dal Rain alpin. Abitadis tipics èn Ramosch-Mottata, Scuol-Munt Baselgia ed Ardez-Suotchasté. A Scuol-Motta Sfondraz ed a Zernez-Brail-Funtanatschas sa chattan – sin gronds mantuns da crappa – probablamain piazze per arder unfrendas che valevan sco piazze da cult.

La cultura da Laugen-Melaun vegn remplazzada tras la cultura da Fritzens-Sanzeno ch'è caratterisada da cuppas pitschnas e da crias cun manetschs. A Scuol-Russonch sa chatta ina tipica plaza per arder unfrendas. Latiers tutgan fuclars ed ossa d'animals chaltschinada, vul dir brischada fermamain. Il center da la derasaziun da la cultura da Fritzens-Sanzeno sa chatta er en il Trentino, en il Tirol dal sid e dal nord ed en l'Engiadina bassa. Tant ils purtaders da la cultura da Laugen-Melaun sco er quels da la cultura da Fritzens-Sanzeno vegnan identifitgads ozendi cun ils Rets istorics.

Ils Celto-rets ed ils Celts En il Grischun dal nord ed en il Grischun central sa fa valair dapi il temp da bronz tardiv la cultura da santeris d'urnas (Cuirat-Karlihof, Vella-Pleif e.u.v.). Ella s'avanza cleramain nà dal nord. En il Grischun dal nord vegn ella surpostada d'in element da la cultura da Laugen-Melaun (cultura maschadada celto-retica). Dapi il temp da fier pli tardiv sa mussan cleras influenzas da la cultura da Hallstatt (Favugn-Felixwingert, cheramica picturada da Tumein). Cun la cheramica da Tumein e da Schneller (gruppas da la Val dal Rain alpin), cun la cheramica cun structura da petgen e pli tard cun la cheramica naira sa manifestescha er en il temp da fier pli giuven cleramain l'influenza celtica dal nord.

Ils elements da Laugen-Melaun dal temp da bronz tardiv ch'èn arrivads sur il Vorarlberg en il Grischun dal nord regordan anc a la cultura retica. Dapi il temp da fier dominescha senza dubi l'element celtic. Per il Grischun dal nord èn avant maun tant las restanzas d'abitadi respectivas (Cuirat-Welschdörfli, Fläsch, Lantsch/Lenz, Suraua, Trun-Darvella e.u.v.) sco er chats da fossa (Tumein-santeri d'urnas, Trun-Darvella e.u.v.). L'element retic svanescha en quest temp praticamain dal tuttafatg.

Ils Leponts En il sidvest dal Grischun (Mesauc, Val Calanca, Bregaglia) datti dapi il temp da bronz tardiv adina dapli indizis per ina cultura tessinaisa-lumbar-ada da Canegrate. En il temp da fier pli tempriv sco er pli tardiv fa la regiun dal sidvest dal Grischun senza dubi part da la cultura da Golasecca. Quella è caracte-risada d'ina gronda ritgezza da chats oravant tut en ses inventaris da fossa. Uschia existan dal champ da fossas da Mesauc-Coop fossas cun skelets e fossas d'urna cun ritgs cliniez da fivlas. En las fossas cun skelets da Castaneda e da Cama sa chattan da l'autra vart bler cliniez da fivlas, penderliezs, ureglins, culaunas d'ambra, situlas (sadellas), chantas cun pichel, spadas da fier, crias, magiels e.u.v.

Perquai ch'i na dat naganas materias primas en il Mesauc, sa tschenta la dumonda danunder che questas ritgezzas derivan. Ins suppona che la val haja giugà ina rolla da mediatur en il temp da fier per il commerzi sur ils pass da las Alps tranter il territori etrusc ed il territori nordalpin. Cumpareglià cun ils chats en las fossas èn ils chats en ils abitadis plitgunsch modests. Dals auturs romans temprivs vegnan ils purtaders da questa cultura designads sco Leponts.

Commerzi dal temp preistoric e dal temp roman

Gia per il temp da crap tardiv sa lascha cumprovar in tschert commerzi da barat. Uschia han ins chattà utensils da silex dal Giura franzos, dal Lägeren (ZH) e dals Monti Lessini (Trentino).

En il temp da bronz existiva in commerzi prosperant sur ils pass da las Alps (producziun da bronz, com-merzi da zin, ambra, recipients da cheramica e.u.v.).

En il temp da fier è vegnì intensivà il commerzi tranter il territori etrusc ed il territori nordalpin. En il Grischun dal nord èn cumparidas furmas da cliniez sidalpinas. Per l'emprima giada èn vegnidias chattadas munaidas. Dal territori da la Germania dal sid è vegnì importà sal.

Dal temp roman hai dà in traffic da rauba intensiv sur il pass dal Güglia. Vaschella da terra sigillata è vegni-da en il Grischun. Vaschella da lavetsch da l'Italia dal nord, da la Bregaglia e dal Mesauc è vegnida vendida da Cuira fin Bregenz ed Augsburg. Ieli d'ulivas da la Spagna, vin da l'Italia, fritgs meridiunals, austras, tailas e spezarias èn vegnidis importads. Muaglia, graun, mel e tschaira, rascha, cristals da muntogna, chaschiel d'alp e mantels da launa èn vegnidis expor-tads vers sid. La rait da vias dastgass esser stada en in bun stadi a partir da la mesadad da l'emprim tschientaner suenter Cristus. L'economia monetara ha remplazzà adina pli fitg il commerzi da barat originar.

TEMP DALS ROMANS

15 avant Cristus – 400 suenter Cristus

Enturn ils onns 16/15 èn las truppas romanas sut l'imperatur Augustus avanzadas vers nord. L'operaziun da zanga è vegnida cumandada dals dus generals Tiberius e Drusus nà da la Gallia e dal Trentino. Ina terza unitad d'armada dastgass esser avanzada da Com ora sur il pass dal Set tras il Surses e la Val dal Rain alpin. Perditga da quai dattan chats da militaria, oravant tut plums da schlingia sin il pass dal Set ed en la regiun dal Crap Ses. En in'acziun d'assagl da stad da 4 mais è vegnì suttamess il territori alpin dal Vallais fin a Baviera. L'intent da questa campagna militara è bain stà quel da segirar ils pass da las Alps e da stgaffir novas basas en il nord da las Alps.

Ina provinza Raetia cun Augsburg sco chapitala è vegnida fundada pir vers la mesadad da l'emprim tschientaner suenter Cristus. La provinza è vegnida dividida enturn l'onn 300 en ina Raetia prima (bain cun Cuira sco chapitala) ed en ina Raetia secunda (cun Augsburg sco chapitala).

Cun la conquista romana hai dà grondas midadas culturalas. Empè da las construcziuns da lain vertentes èn vegnidas fatgas ussa construcziuns da crap grondas en la tecnica da maulta da chaltschina. Las chasas da crap han ussa survegnì pli savens picturas da paraid, stgaudaments d'ipocaust (aria chauda) u da chanal ed en stadas cuvertas da schlondas u er da quadrels. Igl èn vegnids construids implants da

termas, tempels, teaters ed ulteriurs edifizis publics. Er la populaziun indigena ha cumprà vaschella da terra sigillata ritgamain decorada e rauba importada dal sid sco fritgs meridiunals, ieli d'ulivas, vin ed otras chaussas.

Bainbaud avevan singuls indigenz emprendì la lingua e la scrittura latina. L'economia monetara romana è vegnida introducida gist uschè sco – entaifer in temp relativamain curt – l'aduraziun da divinitads romanas. Il latin ha stgatscha en il decurs dals tschientaners las linguas indigenas (il celtic ed il retic). Quel-las vivevan vinand mo en vettas fundamentalas surpostadas. Igl è resultà ina spezia da «latin vulgar» u da «retolatin», or dal qual igl è sa sviluppà la finala il rumantsch vegl ed il retorumantsch.

Cuiria dal temp roman Dal Welschdörfli da Cuiria deriva ina inscripcziun ch'è deditgada a Lucius Caesar, in funcziunari roman aut. Ella lascha supponer che Cuiria è stà in center administrativ gia dal temp roman tempriv. Ils emprims edifizis d'abitar èn bain anc stads construïds en lain. A partir dal 1. tschientaner suenter Cristus ha cumenzà ina viva activitatda construir edifizis en crap. Igl èn vegnidus construidus numerusas chasas cun stgaudaments ipocausts e da chanal. En l'areal Ackermann hai dà in albiert cun picturas da paraid e cun pussaivladads da pernottar.

En il sectur da la plazza da la Stadthalle sa chattava in grond implant termal, bain er il martgà ed in sanctuari.

Suenter la refurma diocleziana da l'imperi enturn l'onn 300 è Cuiria bain daventà la chapitala da la provinza Raetia prima. Almain dapi il 4. tschientaner sa chattava sin la curt a Cuiria in abitadi roman ch'era segirà cun mirs fortifitgads. Dapi il 5. tschientaner èn cumprovadas sin la curt ina sedia episcopala ed ina baselgia sepulcrala. En il Welschdörfli sa chatta-van da quel temp anc singuls edifizis d'abitar ed in implant ecclesiastic cristian tempriv cun in banc dals sacerdots.

Abitadis e sanctuaris romans Sper la Curia romana sa chattavan numerus abitadis pli pitschens en il Grischun. Uschia devi staziuns da via sco la Mutatio da Riom u l'abitadi da Mon-Crest'Ota, tuts dus sin la ruta charrabla dal Güglia. Impurtanta era er la staziun da duana dal temp roman tardiv a Bondo-Murus/Castelmur. Plinavant existivan plirs abitadis fortifitgads sco ina spezia da champ militar dal temp roman tardiv fin al temp medieval tempriv. Latiers tutgavan per exempl Casti-Kirchhügel, Castiel-Carschlingg, Casti, Vicosoprano-Caslac e bain er Maladers-Tummihügel-vest e Sagogn-Schiedberg.

Sanctuaris romans èn per exemplel quel sin il Güglia, il cuvel da cult a Ziràn, la piazza per arder unfrendas a Fläsch-St.Luzisteig. Auters complexs da chats che tiran endament abitadis e chats da fossas derivan dad Andeer, da Cazas-Riòlta Bassa, da Sevgein, da Tumein, da Trimmis u da la basa militara dal temp roman tempriv sin il pass dal Set. Chats da fossas e champs da fossas impurtants enconuschain nus da Panaduz-Valbeuna, da Roveredo-Tre Pilastri, da Cama, da Sta. Maria en Calanca e da la chavorgia da Calfreisen. Els inditgeschan tuts ina speszezza d'abitadis remartgabla dal temp roman.

TEMP MEDIEVAL TEMPRIV

400–800 suenter Cristus

En il decurs dal 5. tschientaner èn las truppas romanas sa retratgas per part da la Rezia. Il territori alpin retic è – sco bastiun cunter ils Germans – daventà domini ostrogotic. Suenter la mort da Teoderic (527) è la Raetia prima, respectivamain l'uvestgieu da Cuira, crudà pli fitg sut l'influenza dals Francs. Il 4./5. tschientaner è vegnida cristianisada la Raetia prima. Dapi l'onn 451 è cumprovada ina sedia episcopala a Cuira. Dapi il 6. tschientaner aveva la schlattaina dals Zaccos e dals Victorids indigens la pussanza ecclesiastica e seculara en Currezia. Sut Carl il Grond ha la Currezia pers l'independenza politica enturn ils onns 773/74. Ella è vegnida integrada definitivamain en il reginavel francon.

Dal temp medieval tempriv èn vegnids perscrutads enfin ussa mo relativamain paucs abitadis. La gronda part è creschida or da culegnas dal temp roman tardiv ed or d'implants da chastels, uschia Castiel-Carschlingg, Maladers-Tummihügel, Aschera-Chrea, Casti, Riom-Cadra u Zernez. Quai ha da far cun il fatg che quests abitadis dal temp medieval tempriv sa chattan per gronda part sut vischnancas actualas e ch'els n'èn – sco construcziuns da lain – betg fitg bain vesaivels e percurschibels. Mo baselgias, implants da claustras ed edifizis signurils (curt roiala a Zizers) èn vegnids construïds vinavant en crap e cun ina liadira da maulta. Las numerusas baselgias dal temp

medieval tempriv cumprovan però ina gronda speszezza da la populaziun en il Grischun.

Ultra da quai datti bleras fossas e blers champs da fossas dal temp medieval tempriv. Ellas na cuntegnan per regla nagins objects da fossa u mo objects da fossa modests. Latiers tutgan per exemplil champ da fossas dal temp roman tardiv e dal temp medieval tempriv Valbeuna a Panaduz cun passa 700 fossas, ils santeris da Son Stefan a Cuira u da l'iert da la chasa-pravenda a Schiers. Fin il 7./8. tschientaner pon anc vegnir cumprovadas plazzas da cult pajunas en il territori alpin grischun, sco per exemplil en il cuvel da Ziràn.

En il temp medieval tempriv dastgass la romanizaziun linguistica sco tala esser stada terminada en il Grischun.

Impressum

Neue Dauerausstellung «Funde und Befunde»
im Untergeschoss.

Konzipiert und produziert von den Mitarbeiterinnen
und Mitarbeitern des Rätischen Museums, in
Zusammenarbeit mit den ausführenden Firmen

Fachberatung und Texte:

**Archäologischer Dienst Graubünden,
Jürg Rageth**

Gestaltung der Ausstellung:

gasser, derungs Innenarchitekturen

Bauliche Massnahmen:

**Hochbauamt Graubünden
Rudolf Fontana & Partner AG**

Übersetzungen:

**Standeskanzlei Graubünden
Jane Gillespie-Casparis**

Die Finanzierung erfolgte durch Verwaltungskredite
des Kantons Graubünden, aus Mitteln der Stiftung
Rätisches Museum sowie des Fonds der Stadt Chur
innerhalb dieser Stiftung.

Das Rätische Museum dankt für Schenkungen,
Leihgaben, Auskünfte und vielfältige Unterstützung
bei der Realisierung dieser Ausstellung.

2011 © Rätisches Museum, Chur